

四庫全書

集部

欽定四庫全書

午亭文編卷三

大學士陳廷敬撰

古體詩

詠古四首

託志在大雅講德觀王風永言播聲律和平民所衷五
絃奮逸響竽瑟難為工詩亡演別體綺靡將焉終我聖
放鄭聲偉哉刪述功爛然三千篇磨滅浮煙空

伊傅起巖野千載道寥寥子房王者佐英風振孤標報
韓計不就推秦功已高嗚呼博浪中舉事輕鴻毛後來
劉項輩以此氣益豪匹夫定王霸片言勝蕭曹晚從赤
松遊黃石可相邀

虞帝善使民造父善使馬吾生良有涯精爽詎相假人
命如蟲蛾膏火競塗赭達人且樂天悠然以陶寫日月
從跳丸匡坐自瀟灑

孟門雖嶮巖洪濤尚容楫大行盤羊腸轅車可馮式君

子貴自信流俗亂珠礫聞言識駿明聽歌知甯戚哲人
領其微而況目所擊

石鼓歌

石鼓歌者韓與蘇我今捉筆捋虎鬚蚍蜉撼樹何為乎
推尋鳥跡閒自娛皇頡古愁凝斯須浮雲變化萬事徂
斗宿下天羣靈趨羲娥掩苒焚劫餘陳倉之野纍纍俱
高穹如屋厚土鋪古物敢侮明神扶博士西顧空嗟吁
偉哉餘慶亦一夫鳳翔廟置煩枝梧是時十鼓一鼓殊

偽有作者其誰與傳師向氏何雅儒殷勤求訪鼓不孤
辟雍保和皆埤汙大觀靖康尾畢逋東遷北徙鳳在笄
王宣撫宅湮榛蕪虞集矯矯真吾徒羅列國子森津途
安頓妥帖星當樞聖道無害茲無虞天作石鼓宣籀書
歐陽雖疑理不誣獻襄宇文宣所奴寶玉詎可方砮砮
嗚呼石鼓窮鏤鏤流浪豈憚馳與驅艱難盡歷形模糊
鱗甲剝落中不枯人生誰能汝鼓如時哉不過生良虛
我歌石鼓排鬱紆韓蘇歌後補所無

昌化寺吳偉畫壁歌

峰巔折屐下半嶺霜蘿煙昏白日冥松風吹鐙山殿開
粉圖黯黹丹青冷問誰畫者留古牆江夏吳生遠擅場
神光出沒視不定動搖地軸天低昂崑崙磊嵬坼四壁
倒翻河源走霹靂陽池蒲類皆細流瀛海茫茫喪歸魄
殊形竒詭殫莫論蠻人鬼伯頭如黿僧言五百阿羅漢
細觀一一皆緇髡古今人貌誰相同吳生作筆如化工
想其用意極變態上下萬古羅心胷生也畫手一世雄

當時待詔金門中仁智殿西被召見短褐垢臉雙鬢蓬
豈知圖寫偶然事後來攬古尋遺蹤君不見功德寺望
湖亭昔日宣宗遊幸處東風依舊春草青新豐翠華莽
岑寂遊人往往知生名人生不如一筆畫千秋萬載傳
其情

東嶽廟像元劉元塑

元字秉元薊之寶坻人官至
昭文館大學士正奉大夫祕

書監卿

上都塑像今誰存劉其同姓鑾與元元昔黃冠事青帝

既貴愴恍營精魂神居青霄清且尊碧雲騰湧連朝暎
真仙上謁不可以面覲况能搏掄以手捫元也執藝高
絕倫帝命象教如通神雕梁繡戶不入眼石間日觀皆
微塵運意豈覺滄海濶凝思暗與春天親駕言岱宗夫
如何設像已覺驚生民其西炳靈公其東司命君絳紗
玉斧蒼龍仗宰執介士俱天人元乎今也不可作高墳
何處荒麒麟又聞大都城遺廟秋原斜古像亦元製淒
迷沉風沙塞長路遠跡不到撫卷稽古空咨嗟人生一

藝足自命流傳百古稱專家亦知虛名竟何益吾生有
涯憐無涯

萬壽寺華嚴鐘歌

永樂四年姚少師廣孝所製

萬石之鐘誰所作矗立平地巍然高不屋而壇豈謂是
土花緣碧松蕭梢

鐘踞於地

我行其下驚突兀兩屐倦著纔

周遭夙知徧寫貝葉文五指欲捫心鬱陶華嚴八十一
卷字星離雲布撐煙霄初如恒河筭沙數忽如大地吹
秋毫又如天門下鈎鎖隄防撇捩神龍跳縮形極意謹

條旋豈知鵬路容搏翺玉繩勾劃有餘境沈郎運筆光

動搖

華亭沈度書

濃點垂露灑銀漢纖波倒海抽琳條寶書

諸品補隙罅下者銑于高蒲牢盡剡雷回雲紘跡直豎
毘城驚嶺標良工鏤刻心亦苦藕絲鍼鋒憐攫搔邇來
漂轉三百載覆以風雨棲蓬蒿詎有石砭厭鼎鬲空令
金鈕閤鼉蛟姚師組鉢遊市朝鼎鑄有耳為爾曹鑄此
那數九州鐵金精恨耀飛廉號吾聞先王古有制不過
鈞石諧簫韶師也佐命專魁杓徒令天樂聲迢迢雲門

大呂神降格何必萬石為鐘豪鳴呼何必萬石為鐘豪

右軍書樂毅論真蹟歌

觀于張吏部家

刻石多有樂毅論風格獨讓快雪堂摩挲卷帙老將至
想像用意分豪芒藤陰別館見真蹟得此令我書傳香
昔者晉室邁喪亂南渡士民何倉皇兵革未偃盛文藻
風流墨妙傳兩王大令學書特從橫右軍作此嚴其防
庖丁遊刃中肯綮東野鉤百看騰驤金繩玉鎖不受縛
天馬脫轡羣鴻翔神光陸離勢欲動洛靈容與驂鸞皇

又如大海迴波瀾珊瑚碧樹枝柯長夏瑚周鼎歷世寶
法墨直欲與頡頏展轉六朝誰所得漂零百戰同興亡
晉陽之甲雜儒翰貞觀御府親收藏太平主家借摹寫
明珠翡翠羅縹緗如雲賓客一朝散丹青豪素空羸箱
大索十日閉朱邸老嫗衣縫潛攜將投之爨下實虛語
人間那得知其詳世上小兒學解事詆誚正士嫌鋒鋷
蛟龍豈無角牙厲雷霆變化誰能量岐陽石鼓久漫滅
昭陵繭本沉芬芳我貧詎有千金直過眼矜耀神揚揚

是日聚觀如堵牆擊撞觝觸頭低昂檐花正落飄不入
燕泥欲下能禁當心記指畫爭俄頃焉得常置几案傍
默囑鬼物善訶護干戈時代遙相望斷行短紙人愛惜
晉家陵土今荒涼對此涕淚翻淋浪人壽幾何徒羨女
日斜掩卷魂黯傷

牆花

牆花繁香新葉肥苔徑漠漠蛺蝶飛鄰軒可假非我樂
故園此時音信稀我生鄙野性放散池魚籠鳥愁帟幘

青門送客一惆悵煙絲草長柳十圍默記舊日所來道
行店歷歷雙板扉我家南谿富泉石兩山夾流村路微
幽處窈窕出林屋山紅澗碧含芳菲試歌韓公犖确句
安得至老不更歸

城南黑龍潭寺西樓對酒歌

春殘龍尾橫斜道羸驂退食隨年少文書叢裏過東風
欲寫幽懷何處好天晴古陂南城南城陰水碧金沙潭
是日宿雨林景澹微波流影青于藍寺前野亭向冥冥

狂飈吹塵暗寥廓，襟花紅蕊寒且禁。
幸不逢花悵零落，亭中裊窕西樓開。
遠煙空翠山光來，漢陂波濤琉璃色。
漢江春酒葡萄醅，直須對此銜金杯。
搥琴擊筑心徒哀，蒼茫萬事渺如昨。
幾度落日軒轅臺，鳳兮栖栖不得意。
東山繡斧流言忌，古來賢聖亦復爾。
醉舞高歌吾老矣，回頭笑謝新少年。
有才無命古所憐。

貽上湘北同遊放生池作

王生矯矯殊絕倫，李生氣骨何嶙峋。
高秋風日稍晴美，

出遊得與二子頻城南滄池鬱漭沆彷彿置我江湖濱
雲棲弟子真隱淪閉關晝坐淨六塵猛獸不搏鷙鳥伏
勅龍取水霑枯鱗靈雞喔咿鈴磬寂白兔撲朔當階馴
世上網罟足怖駭爾曹此地娛秋春可憐四海數兵革
感事觸物含悲辛天狗墮地走郊野熊羆豺虎生攫人
蒼生性命等螻蟻刀俎往往屠麒麟吾哀念此涕沾臆
買放蟲鰕隨細民兩生才可登要津向我肝膽傾輪囷
會當萬里策驥足努力斯世謀致身

九日宋玉叔招同諸子讌集梁家園池亭兼送繹
堂之中州訪愚山嵩嶽以秋菊有佳色為韻五

首

佳日樂清曠登臨池上樓蕭條鴻雁來城闕
颯已秋四邊木葉下亭午寒翠流潏察林樹變
仰眠天雲浮何意京陌間臺榭豁遠眸含顰媚
短景步屨延阻脩陟危興屢奇永念數子遊

結軫來西園佳辰快休沐況有舟楫具林風方
謾謾豁

渚委寒卉時節秀芳菊水汎忻始遊波搖駭流目靡靡
葭莢開洄洄蘋藻逐遠窮林塘幽不異在深谷鼓棹入
莽蒼興酣欲往復還擬挂輕帆去逐鳬鷺速

冉冉節序高風雨懷重九及此弄晴暉清歡亦希有南
原恣羣遊北亭饗朋酒坐密觥籌交語多藩籬剖明霞
散林薄落日延戶牖暝色蒼然來嚴城急刁斗明月懸
中林欲去更回首

回首立躊躇念此秋氣佳娛樂豈終極戚戚動中懷美

人適梁宋驪駒發天街朔色起離筵霜露泣前階列宿
參差明參辰何由偕客子感遠遊願期金石諧

宛陵含清真論詩造精域憶昨遊嵩峰飄然辭京國君
今定相訪雲壑想行色同宿玉女窓朗吟三花側羽客
鍊金骨於此生雲翼相攜掇瑤草寶訣自茲得竒蹤入
紫冥化心合窅默下界瞰九州中天擘四極惜哉縑塵
人臨風空歎息

沈繹堂翰林殿廷橐筆閣門

賜貂圖

為憶疇昔策士年手披射策春風前雲間才子擢上第
掩映金闈榜墨鮮羽獵長楊時扈從校書東觀歛聯翩
詔言中外須駁歷入為公輔出旬宣觚稜回首青霄上
祭戟還開蒿少邊一自鼎湖弓劍遠寂寞蒼梧生野煙
龍飛鳳起旋天柄人文際會風雲盛澤州學士領機要
風裁奕奕清操勁浙東葛公招不來益使清時重徵聘
侍從當時更幾人聲華寥落才難並白頭宮監閣門東

金史卷三
勅旨傳宣沈侍中曾見章華工作賦紅綾分餅

賜恩濃政事堂前昔待詔集賢學士新年少咨嗟沈君
天下奇文采風流傳墨妙重過承明舊直廬螭頭行上近
宸居便殿

召來臨玉几內庭不用輦金輿尚方筆札鴛谿絹龍團
墨花埽飛電生平所學惟正心

天子斂容知筆諫欲將無逸進箴規不數清平供奉詩
是時積雪明丹陛好景斜陽度玉墀自此

乾清頻侍直往往公卿伺顏色有時揮翰晚從容漏下
重城歸不得

溫語親承退食遲鍾王楷法鬪風姿特上漢家寬大詔
間書唐代頌歌辭賜對夾城又移日左右微聞潛太息
九重解賜御貂裘中使催頒鏤金織丹青寫與異時看
覽圖暗憶魚水歡近代遭逢誰似此

天顏有喜畫來難男兒致身在報國恥學時人甘肉食
思深不醅良可惜我聞豪俊頻煩側席求曾誰能緩肝

宵憂柏梁詞賦詎偶爾宣室蒼生須借籌

送李同年之桂林

昔者子往官京縣

李昔為大城令

寒廳夜雪來相見雪花盈盈

墮酒杯鐙前細酌成歡宴有客曾為百粵遊耳熱高歌

騁雄辯卻話嶺表山水奇足跡未到目已眴

中州邢生舊令永福

是日談粵中山水

沈吟別子不能寐起坐題詩廢朝飯回首離

堂夜雪時人生流景如轉電子今尋客舊遊處水石風

流吾所羨五斗折腰且莫辭四十青衫應未倦莫言天

驥隨羸牛要使昆吾淬百鍊
猛獍能為襦袴歌桑麻久
已銷刀劍
藤江花落雁來時
薦書應奏明光殿

秋日祖氏園同肇余湘北以秋水席邊多為韻五

首

日高出南城郊野紛晚秋
蒼茫微徑開蒲葦風颭颭紅
葉捎鞭絲紫花羅馬頭
興來忘嬾漫我行如有求

苔徑連野橋池塘落秋水
飄搖臨虛亭寒流通其裏
始至孤雲飛坐久白鷗起
獨遊良已歡幽懷同二子

甫白渺千載美人接瑶席飛閣如扁舟寒空下遙碧樂
幽趣屢同懷古思逾積落葉滿深林惆悵來時跡

將軍東橋竹乃在韋曲邊軒窓新結構臺榭已百年林
疏出遠岫谿回凝寒煙風景長不殊昔遊思渺然

為樂雖及時日暮哀情多平生滄洲想江海今如何秋
高急戰鼓烽火鬱嵯峨獨愧此亭上臨風空獻歌

詠漢事六首

漢高續秦虐開國乏遠猷作偽導其下雲夢胡為遊既

貴忘急難畏惡如敵讐婦言惟是用功勲滋愆尤嗟哉
青衣路已去不復憂道逢呂后來泣涕翻見收牝雞伏
猛士羞中鍾室謀惜無周身智辟穀從留侯

沛公破咸陽仗劍入秦宮美人充帷帳珍寶如山崇一
朝意已得遑復恤其終興亡在轉瞬虎眈眈重瞳自非
樊將軍禍亂如影從寧待鴻門會脫身刀俎中噲也起
屠狗所見真豪雄儒冠故可溺齷齪多凡庸

項王起隴畝意已無強秦矯矯名將家所敵必萬人大

戰鉅鹿下諸侯莫敢前事定從壁上郝行趨轅門偉哉
戲西會制命杯酒間項王東向坐沛公獨騎奔如何去
咸陽宮室皆燒燔亞夫無一語韓生空殺身伊昔割鴻
溝天下約均分太公脫高組呂后辭下陳漢王欲罷歸
子房勸進軍楚歌四面起往事真酸辛至今下相祠黯
淡荒荆榛虞兮色彫落帷帳凝流塵坐傍伏烏騅猛氣
慘不伸英雄逝成敗懷古一霑巾

安劉必絳勃平智足交驩王陵雖少戇大義折其端知

人誠匪易處婦良獨難娥姁北司晨祿產虎而冠自非
朱虛侯非種除方艱辟陽遊卧内人彘棲厠間骨肉亦
何辜酖飲裂胃肝吕公竒此女與之遺禍患

漢文恭儉主止輦事最傳亦復事羽獵不敢盤遊田萬
乘登虎圈嗥歎羅滿前山禽與原獸名數方紛然顧問
上林尉十問十不言蒼黃左右眡嗇夫代尉宣口對如
響應帝曰此吏賢釋之汝受詔特拜嗇夫官逡巡不肯
拜謂佞奚取焉上言周張輩下言秦漢間納諫誠可貴

聽言古所難謁者論嗇夫嗇夫罷超遷絳灌短賈生賈
生亦棄捐

田橫能得士高義陵千秋橫來大者王橫來小者侯慄
慨五百人不與韓彭儔富貴苟不樂沈殞遂所求至今
滄海上天風激清流

黃鶴樓歌送魏使君

我初旅食京華遊結髮願識韓荊州掖梧蕭蕭苑花寂
憶昨含香西殿頭是時武英數奏事

九重動色親嗟異驄馬朝回白玉鞍銅龍夜直青綾被
使君幾載為清郎我曹文采爭輝光宣武水樓煙柳碧
城南古臺野菊黃聯翩不悞尚書期

龔宗伯
芝麓

婉孌能傾

翰墨場即今會合亦何有汪王程董化離久

茗文西樵
阮亭湟椿

玉虬別夢初驚朔塞鴻離筵又醉都亭酒青霄使者下南

雲翼軫星文拱北斗使君家世清忠臣步武流風應絕
塵要與丹青爭氣象足令琬琰重嶙峋江表人才席上
珍驂騶造父遇有神送君車騎翩然行仰視白日霜天

金史卷之八
卷三
清秋色已老漢陽樹春風空憶武昌城我聞崔顥詩中
語黃鶴長江萬里情白雲縹緲楚天外黃鶴飛去樓空
在使君登樓黃鶴來煙波渺渺心悠哉

書上官松石所藏程鵠畫梅即送之還河東

我觀程生所畫梅宛在萬里厓壑間蹇驢風雪曉陵兢
便欲跨之尋寒山樓角鳴鳴笛聲起燈前花落清霜裏
曲中畫圖相向開吳綃一幅天如水北風曠野涼蕭騷
平林低亞生輕濤屈鐵溜雨蟠積石瓊英拂地連蘅臯

上官中丞好奇賞對此亦足生清豪掉頭攜畫不肯住
野宿谿行任芒屨藐姑神人冰玉肌散作寒花亦無數
卻憶少年行樂時綺窓狼藉羅浮姿山中雪深疏影亂
紅橋界出橫斜枝橋下沽酒橋上醉耳熱狂吟百不思
舊遊已散空雲樹酒醒鐘微隔煙霧回憶三更挂月村
夢魂十載還家路殘香冷艷真愁予隴頭驛使誰寄書
君歸試過草堂問梅花遶屋今何如

憶樊川梅花用東坡松風亭梅花韻

半林喬木樊川邨數株梅花牽夢魂
媚娥靡曼不挂眼
天桃野杏為狂昏一屢未安揚子宅
五畝欲老香山園
玉妃鬢髻露身手暗香冷艷來相溫
有時先生春睡美
綺窓喚起驚朝暎經寒故嘗卻羅幔
避風勤與關柴門
翻笑孤山林處士擁衾對花花無言
只今人去花寂寞
誰憐落月閒清尊

送富雲麓少宗伯還閩中

瑤華易衰歇相識紅顏稀
往者公卿人至老不更歸
我

病卧送子心與閒雲飛秋月照離席挂帆揚澄輝滄溟
波萬里客夢相因依築堂面海水島嶼開巖扉敷榮日
南花荔子生已肥一噉三百顆孰與斗粟饑予亦同流
萍浩蕩江湖違茫然惜遠別白首思音徽

赴北鎮發京作三首

塞雨作雪花春風落庭樹時節尚苦寒遠行生百慮蒼
涼城東亭門外舊京路驅馬覽大荒黽俛戒徒御離鴻
何翩翻黃鵠已軒翥平生曠逸懷海山得奇遇

銜

命出京邑含情向朔塞春色蒼然來雄關渺安在征馬蕭蕭
鳴東風卷旌旆鄉國別已久況復窮荒外前臨碣石古
顚視滄海大朱輪日交馳山靈邀我輩豈無江湖樂茲
遊亦已最

舊披遼海圖天地疑將窮遠遊足自豪萬里浮空濛日
月出海水乃在扶桑東男兒志四方蹙迫以自終翻慕
遊俠兒鞍馬生雄風行行盡絕漠仗劍陵長虹

曉發通州

陵晨命風駕旌旆風悠悠連蜷沙浦隄浩渺開滄洲回
首見樓堞孤城如浮舟荒陂下遠雁細浪迴輕鷗煙中
出颿影彷彿不可求誰能捨短策萬里乘春流

射虎行

北平太守飛將軍城南射獵天風昏射虎中石沒羽箭
至今石戴霜花痕蕭闕昔日良家子結髮從軍動邊鄙
寂寞南山憶夜行霸陵亭尉醉呵止一朝飛蓋來北平

三邊夜無刁斗聲將軍善射出天性射敵欲盡魚射生
虎也騰傷上猿臂將軍意氣輕搏刺怒形威振萬物伏
精爽足可貫厚地我來訪古盧龍傍廣不逢時吾黯傷
吹簫屠狗有異表時來起作諸侯王

食榆關驛有老卒語世父侍御公令樂亭時事

下馬食驛亭杯酒乾欲去憫此人凋殘停驂詰其故驛
卒老記事灑泣跼而語此地古要衝車馬繁徒御小縣
丁徭稀取足外協助樂亭籍民夫十人九饑仆當時陳

縣尹吾民賴調護走謁大府官抵掌借前箸庶人者在
官定祿出邱賦枵腹事公家公事亦繆悞是時大府賢
立為尹拜疏僱直餘貲糧行役乃犇赴尹去民寒饑尹
來有衣袴驛東古神祠尹至常此駐驛南荒沙磧是向
樂亭路邇來四十年吾民思乳哺我聞驛卒言雙淚零
如雨尹吾先伯父宰木已拱墓縣路邈難踰古祠在何
處馳馬往視之祠門日斜暮故額宛猶存戊寅字細署
戊寅吾以降老大凜百慮酹酒再拜行春風吹獨樹

澱海樓觀海

燕山蜿蜿如游龍東將入海陵虛空巒壑洶湧變形狀
騰波赴勢隨飛虹長城枕山尾掉海海樓倒挂長城外
地圻天分界混茫山迴城轉橫煙靄樓脚插入大海頭
巨靈觸搏海怒流呼吸萬里走雷電蘄鑿中涌堆山丘
乍到魂慮忽變惛意象懍慌難尋求五岳拳石渺一粟
九州小嶼浮輕漚滄溟浩蕩乾坤窄弱水流沙在咫尺
扶桑弄影杳何處空青一綫搖金碧卻憶洪濤汎濫時

蒼茫神禹經營迹百川既導萬穴歸天吳海若安窟宅
四海以內真彈丸秦還漢往如翻瀾海月萬古堆玉盤
願得一食青琅玕乘風破浪生羽翰我來手拍洪厓肩
仰天大笑忘愁歎

出塞行

平沙漠漠虎跡高春風蕭蕭馬鳴號雕弓韞服箭在腰
南登碣石東度遼江湖細瑣不足數滄溟萬里觀雲濤
丈夫得時展壯畧坐擁爵印麾旌旄不然五嶽及四海

笑看珪玕如秋毫安得白首事文翰苦吟寂莫隨蓬蒿
新購龍鱗雙寶刀雪華照地寒生毛佩之金鑲紫錦絛
酬恩未忍便歸去且向沙場看射鵰

首山

塞外山益奇圖經無其名土荒昧勝蹟問之傷我情首
山名頗佳三峰何崢嶸上有古時戍下有今時城南山
如龍卧北山如象行中裂忽如鑿漠漠春水生厓寺面
怪石角立森從橫林岨繡苔蘚丹碧含晶英山川既盤

鬱風氣亦高閣太息炊烟稀沃野無人耕

宿十三山下

暝憩投孤煙野宿臨大荒夜窓過虎豺青狐歟空梁摩
挲玉函字凜凜置我傍精禱寡宵寐明發嚴晨裝禹跡
昧䟽鑿虞書分紀疆齋祓入神境王事肅有常豈敢憚
險遠

皇命被寵光萬靈應來格鎮此粉榆鄉

醫巫閭山登覽

我尋桃花洞花源寒蕊遲縹緲呂公巖遺蹟不可追古
松千年物下有無字碑黯慘積鐵色石苔銅綠滋雕斲
慨秦漢混濛思黃羲靈風生兩腋扶藪凌歊危羽節儼
前導雲旗紛後隨神人展歆盼賜我金莖芝服之身力
健延年以樂嬉

塗河行

拍天風滾邊沙來亂石却走如崩雷馬蹄摧裂車輪折
塗河三日鳥飛絕野陰晝昏對面疑猛虎在前何由知

黃熊赤豹紛相追勸君早宿荒茅茨

入盤山至中盤寺望李靖菴絕頂諸勝蹟顧念歸

路不得徧遊為詩寫懷

我聞盤山七十二佛寺寺寺落花流水中古木分徑延
客入谷口往往聞微鐘稍喜怪石堆磊砢位置天巧煩
神工飛巖百尺下澗水谿流時帶殘香紅山深日斜意
惆悵車顛馬仆何息息中盤峻嶒倦登陟山靈奇詭焉
能窮衛公舞劍臺最古磨厓勒石真英雄天門中開飛

鳥過巉巖峭壁雙青銅絕頂塔輪照西日影落塞外隨
長虹我行荒徼困鞍馬親按唐壘尋遺蹤春風血染邊
花赤夜雨苔生戰骨空誓臺草木莽岑寂將軍片石青
山崇此來探勝樂幽閒翻增惋歎愁心冒孤峰飄忽不
可到還顧所歷煙濛濛歸途草草罷遊覽他時蠟屐扶
短筇

高陽公生孫作歌

名家父子至宰輔漢有韋平宋韓呂高陽吾師真天人

風雲接跡變龍武門地朝廷舊羽儀沙隄夙昔經行處
西平有子生更奇兩人並是麒麟兒長君娟靜玉雪質
次君矯厲鸞鶴姿仙李盤根久碩大謝家玉樹恒華滋
前年次君引鳳雛我公退朝清讌娛錦筵繡茵紅氍毹
彈絲擊鼓吹笙竽賓客合沓臨交衢後堂高會羅生徒
今年長君懷明珠瑤環瑜珥嗟不如我公不樂胡為乎
側聞

聖主勞宵旰邊機日奏明光殿廟謀勝算倚元公軍檄

詔書駐馬辨嗚呼為臣既不易我公精忠日月貫所以
當筵再三歎太平指日定戎行我公名與凌煙長一身
常繫安危望領首兒孫笏滿牀君不見裴晉公郭汾陽

八月十四夜月

五更雨作漏點歇涼風吹衣坐東闕正恐秋陰欺出日
翻愁雨色礙行月騎馬掖門雨細微黃昏茅堂燈火稀
登樓高雲亦解駁暉暉月上古城角天寒野曠沙場多
嗚呼奈此明月何

中秋夜王北山給諫見過有懷吳玉隨孫惟一兩

編修

昔者與孫吳翫月城西亭蕭蕭天風來萬里搖青冥寒
空盪園魄驚鳥羣悲鳴明鐙曜曲房淥酒淒以清短歌
易慷慨良時傷我情奄忽浮雲馳躑躅東南征光景不
可駐犇落如流星二子渺江湖芳顏坐凋零四海何寂
寥獨處思平生惟我與君子綢繆結至精遙夜命儔匹
羽觴羅中庭清淺河漢流金波正泠泠濡翰發妙製朱

絃激新聲今日不為樂別後徒屏營

書湘北秋水漁父圖

吾聞瀟湘洞庭煙塵中滄洲不合容漁翁今之畫圖尚
復爾孤舟渺渺寒林東遠峰青冥水雲白秋樹蒼蒼楓
葉赤草木曾無戰伐愁谿山欲老孤蘆客李生雅好江
海奇張颿鼓櫂遊何時且當結束事鞍馬與子射獵南
山陲

吳大理宅觀菊行

自為燕山十載客軒窓寂莫無黃花今年何處花最盛
走馬來尋大理家九日傳聞思一見人事經秋阻遊宴
十月向盡開未殘天寒野陰颯霜霰小闌曲幕雲錦張
屏風隔花花低昂想君位次有深意宛然置我東籬傍
坐中豪健富與王亦有兩吳成清狂逡巡相視不欲去
白日漸沒冬夜長冬夜沈沈鐘漏度鐙火交橫花影互
不知雨雪空中多銅槃絳蠟銷煙霧萬點繁英豈等閒
百罰深杯莫論數君不見去年花貴京城裏朱門進花

如流水今年花賤軍興時公侯邊頭征馬嘶世間萬事
反覆俱如斯與君傾倒且盡花前卮

孫籀菴贈篆章歌

射州學士才力健上慕稷契羞管晏天生文采魚奇懷
在於敬也徒然羨方寸之石珍南金篆刻變化窮古今
恍然置我秦漢上熟視歎絕誰能禁想君拭石初經營
意匠鑿石石怒生弩張劍拔相盤蹙捉刀如筆刀從橫
自言工巧不貴物藝技那與流輩爭憶交學士十載餘

太學釋褐同時趨門前石鼓累累俱字勢蚪蚪分錨銖
我初開口恨詰曲學士發聲如貫珠寶符玉璽今焉如
絲綸手握承明廬太史大篆訝顛顛中郎石經紛魯魚
天子今年開石渠校書同異羅諸儒今君請急何為乎
吁嗟汝歸形影孤古人戀闕憂江湖

題容齋所藏畫松

曉蹋掖垣松色濃宮樹綠陰宮日紅歸來卧想西窗中
西窓恰對西山峰雕闌玉碣紛璉瓏碧雲寺前雙老松

別久霜風應更長當時蠟屐曾同往幾人雲散與星飛
只今惟有松濤響山徑冥冥松有聲苑松山松無限情
急呼濁醪埽醉墨為作李侯松樹行

立秋日子顧繹堂貽上湘北幼華過集

遊子感時節含意難獨立秋色蕭條來西日忽已入風
落庭草低雨過檐禽集高月夕尚圓明星露猶溼兵出
吟笳稀戍遠擣衣急良時今欲暮無為苦憂悵請看頭
上絲日夜不可戢危塗行潦深白駒願維繫

九日同貽上湘北集城南水閣

高閣峨峨凌寒空眼底城闕秋光濃
穠木葉丹晚菊瘦杯影遙度長天鴻
殘陽未斂浦煙積渚波細浪涵青銅
明霞吹落山勢動蒼茫檐際聞悲風
頰身願接兩羽翰探奇何必扶短筇

送張簑山歸廬陵

秋陰匿景光淒淒增暮寒鴻雁應候起
黃鵠臨風翻高飛覽九州誰能斂羽翰
念我同袍士矯矯青雲端北風

吹河梁車徒不可攀
高林集天霜大海激回瀾
君子抱亮節志士多苦顏

君恩當識察臣義擇所安
肉食等藜藿榮名配芳蘭
勗哉千歲業離別何足歎

益詠堂歌

為宋玉叔先人作

頓邱之野古臺側
宋公几筵儼在茲
杲日對峙霽雲廟
朱暉映射青霞祠
宋公昔時治茲土
摘擢姦良桑穀滋
召去民若失慈母
待公不來交涕洟
我民立祀謹伏臘

桂棟蘭橈施華棖公來翠輅驟驚螭流雲前戒翼兩旗
朱衣彷彿靈風吹高冠長佩紛陸離耆耄偃僂薦酒犧
老巫起舞韶穉嬉進跪再拜前致詞我民報事無盡期
君不見南山松柏斧聲悲不知何王陵蔓草縈纍纍野
棠開落無寒食麥飯淒涼記歲時又不見朱邑桐鄉冢
羊公墮淚碑千秋終古英靈在留與遺民作去思

送宋荔裳觀察赴成都因寄艾石方伯

當余束髮負奇氣草莽夢想英雄人黃塵走馬京華道

逆旅蒼茫會有神片語交懽如故久更兩王生夙所友

謂子底
貽上

步屨春風日往還韋曲殘花灞陵柳錦貂數付

黃公壚劍歌蕭條白日但龍鸞之文奮奇響傳觀賓客

爭嗟吁才名舊壓金華省畫戟清香輟朝請忽漫扁舟

掉五湖輕鷗浩蕩烟波冷盛世求賢重外臺玉驄金絡

日邊來隋堤楊柳蜀岡道驛樓官閣為君開吳洲渺渺

楚鄉去斜日西川在何處送遠秋風萬里橋懷人暮雨

三巴路津亭解纜彩雲生岍草汀花紛古情江帆笳鼓

黃陵廟野戍旌旗白帝城君家吏事兼文藻伯氏并州
吾舊好與君前後間清塵相逢為道相思老阿戎七歲
筆陣強草書大字森琳琅更煩傳語寄一幅我欲攜之

貢玉堂

艾石幼子七
歲能草書

贈賈中丞

尚書奇瑋姿騰蹕萬夫上徒步霄漢間談笑躡卿相風
雲入高懷眉宇展清曠自余韶穉年轟雷激犇放聞聲
慕執鞭拘牽屢惆悵當公撫豫還余獲拜天仗相識交

戟下退朝覺神王

聖皇念才臣秦關迫亭障

詔曰汝往哉厥績今孰讓石經魯壁餘散缺亂纖續七
篇爛慢出炳如日星亮是時邊陲靜舉事愜人望棧道
細雲連行旅色沮喪下臨不測江中有魚腹葬火攻出
上策慘澹勞意匠此時又用兵通行得無恙餘威動絕
域猛氣快所向今之新將軍公之舊門將廉頗尚善飯
審琦加酒量城南獨樂園紅亭枕清漾彊健歸林泉念

時增惻愴同之喬山鄉風義不可忘公言此宅舍身外
即冗長乃知英雄人出處有殊狀襟記公生平挂一恐
失當他日尊酒間從容或細訪

吳耕方翰林自其先世三為國學官詩

世祖臨御日邊隅宴無事向用文學臣
詔達少拘忌曰
惟嚴制科始進絕流弊南北上賢書

殿廷詔歷試曉風含元側儒衣飄翩侍輦路細草菲抽
毫發遙思漏鼓隔花外宮鶯轉蒼翠閣門下題目

重瞳校文藝翰林冠南彥三試名不二雖匪一戰霸十
上徒顯賴至今春雨詩雅縟稱經義

帝歎此奇才準以貢士例對策銅龍前

帝喜在高第竟至越春官此人

上所置回首蒼梧雲往事橫涕泗穰穰時會殊冉冉日
月逝左遷學署丞經年獨留滯朗吟百寮底脫略公卿
勢屈賈才見疎臯稷時所致吁嗟老鄭虔三絕今猶記
竭來惠長謠風流鬱清製上言陳

主恩下言引家世君之高王父亦仕成均地是時貴生
徒人文實振厲肅肅胄子行落落青衿意磨丹漬墨間
關國家大計名臣三數公皆先生高弟逮君之王父先
後清塵繼緬懷莊烈時臨雍步階庀公班立館下望見
容狀異顧問此何官厥官何姓字引坐黃幄右傾耳聆
論議琅琅魯頌音大吐儒生氣錦綺出上方小臣前拜
賜故知人重官初不以祿位君今繩祖武肯使聲華替
迺者

聖天子羅賢充中祕東馬嚴枚流登用各以次嘗欲開
薦口揣分輒遜避中原方治兵豪英手戎轡幕府資參
謀

朝廷望開濟君其務韜晦寶玉豈終棄名譽起賤貧君
臣視遭際古來賢將相靜養俟所至

送崔定齋還百泉

讀書不求聲跡高棄如涕唾輕鴻毛譬之飲酒不盡醉
此中為樂方陶陶十年閉戶閱墳典千秋懷古相遊翱

竭來登車意慷慨
擘轡奮裊干雲霄
一髮凜凜引鈞石
百川浩浩驚狂濤
世人遞戒但指口
坐令志士空疲勞
我戀微官尚爾耳
跌宕文史惟嬉遨
少壯幾時堪把翫
意思蕭颯枯蓬蒿
晚聞至道頭欲白
嬰觸塵網非賢豪
君歸待我蘇門上
攜家欲往從招要
買田築室可終老
安能頽仰隨桔槔


贈孝感相公

十有四載春惟三月
日吉枚卜擇近臣
學士登密勿搢

紳賀於朝處士慶於室僉曰

帝知人吾等夙願畢公無得志容庭館轉蕭瑟公誠王者佐生平學稷契致君慕堯舜自此見施設銅扉半夜開沙隄帶月出暮讀書百篇朝入語移日勞瘁咫尺地欲使萬國活時方事南征戎馬久未歇黎元尚瘡痍原野肯騷屑晴風卷軍旗禾稼委未折况我仁義師忍此田間物公為民請命聞者涕淚落數日政事堂絲綸慰飢渴中朝相司馬姓字及走卒身當畫凌煙名其懸日

月昔時同學人雲霄歎蹇劣



午亭文編卷三

欽定四庫全書

集部

午亭文編卷五

詳校官庶吉士

臣汪彥博

助教

臣

常

循

覆

勘

總校官庶吉士

臣倉聖脉

校對官中書

臣牛稔文

謄錄監生

臣許紹錦

欽定四庫全書

午亭文編卷四

大學士陳廷敬撰

古體詩

春遊摩訶菴三首

微雲如媼娥峰嶺立鱗次幽尋即郊野山遠已愜意落
花委清晨疎雨溼宿翠繫馬柳陰斜尋僧殿廬閱松風
吹冷院憩寂吾所嗜

涉徑憐青蕪尋花悵細萼覽遊登故墟裴回感今昨荒
庭步野鶴廢谿委石攬琴琴悲風鳴觀身轉靡託聲聞
自狹劣即事動心魄

娟娟西軒竹生此祇樹林疎磬度寒翠時聞天籟音頗
覺衆緣盡冷然清客心落景下遠堞孤霞斂夕岑回鞭
拂暝色歎彼歸巢禽

施愚山見寄長歌和答

闌珊夜雨雞鳴號關山夢回心魂勞我所懷思渺天末

涼風一起秋蕭條美人昔贈相逢篇吳綃三尺森瓊瑤
今晨曉牕坐展翫我欲報之情鬱陶憶昔相逢客京輦
城南華徑紛招要酒酣惆悵秋燈紅羨我鬢髮漆黑同
即今倏忽別四載頭上已有霜枯蓬眼前諸子幾人在
浮雲溝水馳西東萬事回頭淚沾臆人生朝露誰能必
楚澤難招宋玉魂維山不返王喬舄
指荔裳西樵 二子歌詞
自絕塵聲華爛熳今何益男兒七尺良可哀生存華屋
終黃埃儒術用世行已矣浮名寂寞何為哉不如放意

遊八極埽除文字栖淵默塵根未斷幽憂來相思茫茫
江南北

述舊贈胡海若

昔者在瑣闥下簾過春風給諫吾朋鄰接鄰視聽同寢
食襍鉛槧文墨羅青紅尚書契祕解洞矚疏心胃無旬
秉華燭往往連晨鐘君壯我年少意氣陵雲鴻翻飛却
垂翼頭腦非冬烘至今封事草烜赫動

九重悠悠二十年別君如轉蓬吾壯行及衰君復何豪

雄託志在忠雅夔契可比蹤功成思歸來與子尋赤松
題汪蛟門百尺梧桐閣圖

別館秀雲木碧梧散層陰高閣與之齊登茲靜客心映
簾出脩枝開牕面平林清暉滿瑶席含情託書琴美人
獨晤言舉世難知音

送杜翰讀還南宮

二月急霰零微綠蔽春草飄搖離筵花嘉會苦不蚤生
平嬰世網簪紱自紛繞至人貴樂行所憂為其道炳耀

乾初爻觀玩可終老悵別盈酒觴贈言傾懷抱灝灝將
安窮已大萬物小古之英雄士進退凜師保時來樹功
名浮雲點蒼昊

豆葉

我家谿谷間隘陘硯田多細岑驅羸牛如蟻緣嵯峨高
秋八九月豆葉紛交加婦子散丘野採擷窮烟蘿盛之
維筐莒湘之匪鹹齏菹之老瓦盆濯之清流河潔比金
雞露美如瓊山禾條枚感時節調飢發吟哦

贈于子龍秀才

天地大晝夜終古旦暮間渺然思洪荒忽已幾萬年子
夜及晝辰五時去翩翩堯舜適在已文明麗中天仲尼
丁我會日午今少偏炯炯青春遠淒淒草木繁天工窮
藻績聖道芟榛管未過而戍來人物皆磨鐫堯夫有此
語紫陽著之篇且娛圖書側聊想義文前一息而萬古
不隨運世遷于生蚤契道謂予云之然

治家一首喻家僮

治家良獨難僮僕恣面欺文誠悵徒設鞭撻憐屢施我
乏克己功訓化乖所宜每玩家人父嗃嗃無嘻嘻終然
悔厲集喜怒生妍媸我愛未果是我憎未果非渺然八
口多紛於將六師旨哉古昔云人固不易知何況天下
廣利巧爭芒絲謠詠工噎媚忠信經嶮巖結髮已白首
那用相乖違感此諭汝曹愴惻垂涕洟

祝氏園同王幼華給諫汪蛟門舍人作

斜日秋城隅丘冢如履綦念我為娛遊懷古心翻悲花

荒奉誠園草積平泉池食客一朝散朱門生棘茨昔者
場牧地高樓浮雲齊飛除通窈窕曲榭迂攀躋夜涼增
脂燭柔指彈哀絲迴谿激清風音響何淒迷椎牛擊肥
豕行爵正逶迤東方日欲出霜落凋華滋不見幽居客
貧賤甘如飴

為汪鈍菴作

聖路久充塞百家羣背馳弱齡謬志道中與夫子期斯
文映朝著每見慰渴飢高詞婉墳典渺論窮黃義往牒

徒紛紜蹤緒幸可追迢迢數千載此理不復疑傾膝接
誦說辟呬將焉師摻袪詎忍別抽簪去若遺江湖逾千
里日月垂十朞

聖皇重儒雅

詔使舉所知是時忝從臣玉榻侍右螭下直金明門羸
馬驅何遲呼燭夜草奏晨謁前致詞為言此人賢邈焉
超班資

至尊鑒樸鄙耿耿勤

睿思每蒙再四問願見心則夷堯峰卧未起敦迫煩有
司君抱移疾志我懷將母悲寒暄語未竟驚喜翻涕洟
倉皇聞閔凶號天失我慈青門灑血泣此恨無津涯隴
阡得書札報我還山時盛名不易居精理寧淺闕行身
凜尺寸涉俗虞磷緇大賢民所仰永言福履綏

贈日者

學道無定力忽忽悲其生願得如雲翮振奮乘風行我
辰命在乙酉金來伏藏譬彼松柏姿徑寸遭殘戕園林

植弱木所喜隣春陽萌芽雖蟠屈節幹森微茫虛乏棟
梁用懼為斤斧傷間尋日者語聊寄樗散情謂如月在
天雲卷三霄晴微纖不受污皎皎金水清我何落世網
婚宦相牽縈耽野向瓢笠識分遺簪纓輕肥恥蔡澤揮
手辭唐生

春日遣懷

人生誰百年一愁一回老愁斷還復來人老不再好青
春能幾時落花已堪埽夜牕盈觴酒慙輟憂心擣寄語

金閨人山中長瑤草

送吳孟舉還語溪

雪晴夜闌鐙花長西園祖席飛華觴
風笛數聲迴塞雁驪歌同聽是他鄉
燕山城頭落月白罷酒登樓念遙昔
江上桃花春水生孤舟惆悵南歸客

贈施硯山侍御

北斗挂席銀漢橫秋晴炯炯明
長庚遙思避馬棲烏地錦燭華堂觴
緩行丈夫五十如少壯努力清時致
卿相

瓌璋大衡東序懸威稜喬木干霄上憶昔迴翔郎署辰
傾朝才調更無倫奏賦明光傳制草批荅淋漓

御墨新柱史東臺分鈇鉞霜驄遙度關山月坐挹南薰
解鬱陶行經隴水聞鳴咽回首流光十五秋我初通籍
從公遊只今老大看如此公也聲華罕與儔

天子宵衣臨玉榻對仗朝回趨入閣霖雨吹噓徧野烟
風雲指顧生閭闔珥筆儒勲上景鐘猶龍異世繼仙蹤
身有葛洪丹竈術名成王掾黑頭公棲遲金馬看銅狄

十五年間事歷歷殿門執手繡衣人猶是當時好顏色
送孫古惶赴南靖

當時策士蓬萊宮孫郎射策實第一紅綾分賜上三頭
榜墨中更臚唱日故事科名領石渠校書初入承明廬
不然翱翔郎署含香趨折腰手版胡為乎竭來詞賦遊
鴻都留滯山公啓事書未老馮唐顏色在豈應騎省鬢
毛疏萬事反覆浮雲徂人生意氣無時無一朝懷綬聞
天去驪駒躡春草色暮十載親闈奉檄歸版輿門外芳

非路落日蛟龍江水深煙濤鼓檣鳴素琴縣道荔香雲
錦爛訟庭花合海風陰青衫皂蓋行春地急牒繁詞滿
巾笥虛左名王璫瑁牀征南幕府樓船騎足令島嶼坐
銷兵炎荒盡處無烽燧天隅民社仗書生漢家功勲重
邊吏君不見長安貴人簪華纓撫時坐論空深情朝擁
文書夕鞍馬羨爾騰驤萬里行

出守行送程使君之桂林

使君去歲當干役道出并州不十日明月關山寨上樓

長歌為報長相憶使君今年出守行翩然五馬西南征
一別青門無近遠况爾迢迢萬里情吁嗟往事重回首
舍人供奉金門久校書我在日華東橐筆君隨丞相後
紫薇典故問西廳鸞紙詞頭歸大手窈窕清禁步逶迤
欲出往往呼曹偶長安水樓三月時畫簾柳影青交枝
御溝殘紅引吟興草橋暮雨同襟期自從輟直承明殿
畫省回翔阻歡讌飄零海內賓朋稀經旬不覩故人面
雖不覩故人面跨馬城南走相見火雲突兀山崎嶇五

嶺炎熱愁人心君今朝辭燕嶠日夢魂夕到湘灘尋君
不見劉蕡上書翻見抑同時數輩無顏色李廣難封數
果竒延之出守情於邑丈夫身為二千石通侯爵印唾
手得行矣風塵須努力獨有別離心日夜隨君去蒼茫
百粵烟巒深相思江上相思處若過橫江見李卿
為道新知不如故

李令
永福

書張滄溪畫花鳥

山北山南春十里兩岸桃花夾谿水畫圖相向春風開

山草山花紛未已水漫漫兮山崑崙張侯邀我題畫尾
問侯胡為獨閉門巖檻冥冥花氣昏水禽陸禽各相命
千樹萬樹春風翻君不見張侯昔日官滄谿邨邨花柳
流鶯啼秋錦山前紅溼處至今猶憶海棠谿

照鏡

多照湖州鏡容華能幾時霜風吹暮雪短鬢怯成絲此
夜關山月空懸萬里思

萬泉寺二首

野峰青嶢嶢濤瀾或相似北遊慕江湖睨眴久非是塵
沙激箭鏃聒聒困人耳眼明柳邨樹草徑披烟水落鴈
隨綠波放鴨逐紅蕊輕濤不容楫濺沫纔濡軌空陂自
擊撞枯荷鬱填委渺然想滄洲駕颿涉涯涘

寺門落花時泱泱流泉注我昔遊南邨小丘柳夾路馬
箠颺迴風帽簷岸斜樹豁然登土城垝垣慄晚暮濁醪
蕩羈情殘陽窘野步禁鑰下急符昏鴉屢相赴及茲頗
放浪悲樂亦更互且復遠吏舍無妨日歌呼

為王黃麋給事題戴蒼五君圖

黃門逸氣空雲烟翰林風度豪且妍

舟次

眼中兩人吾所

賢餘子意態皆翩翩摩挲久視心茫然羣游憶昔城南
園禹生畫我黃門間蚤衰影入秋毫顛我為生誦蘇公
篇潞州別駕電目懸浩然吟詩肩聳山飢寒富貴雲在
天彷彿圖畫空流傳人生是幻繭自纏童牙華髮俱可
憐不見戴蒼寫真年黃門顏色得似前

和子瞻飲酒四首

市朝遞相欺幽獨娛吾真自非飲者流百感危其身蕭然杯觴進宛爾顏頰新指口但此物掉頭謝時人

我生命在天舉杯屬雲漢疇能卻老病聊用緩憂患幻影悉破除風霜一銷散夜長忽復醒愁來每投間

少寐甘獨眠枯腸輟夜茗膠膠晨雞鳴映映鰥魚醒今來紅塵中頗涉黑甜境所幸肺病蘇一杯還酩酊

梅蕊忽在眼蕉葉時沾唇自識瓮頭味不數梨花春英

英林開府此事功莫鄰空傳梅麓翁白首為波神

林開府家

有瓮頭春酒世傳
河督朱公為河神

夢松歌寄素心

前年百鶴阡種松宿山家去年客京洛兩見寒梅華松
小隔丘隴人老長天涯我生一飄蓬翻如繫匏瓜夜夢
過石閭明滅隨陰霞山僧色冥默問訊松如何旅魂知
歲寒鬱鬱霜中柯流風響深谷疎影吹交加龍雛無卑
勢蒼然鬱爪牙對面天馬山高樹聲相摩歸來關塞黑
林木猶紛挐殘鐙記往路別淚落滹沱得句如春草為

此夢松歌

十二月二十六日湘北貽上幼華蛟門見過用東

坡饋歲別歲守歲韻三首

為客心久孤踽踽孰予佐冠蓋富烟海取友譬權貨錦
衾混裋褐物豈在細大以茲寡歡遊窮年掩關卧至竟
二三子邀賓必在座東風迴龍杓西日遁蟻磨別時已
屢多歲闌詎重過相對各衰鬢陳迹勿田賡和

歡多歲易速愁多歲易遲我今既不樂歲往焉用追載

賡別歲吟與子俱天涯城南菊花候水亭楊柳時江東

有歸客萼美鱸魚肥

謂茗文

人生聚與散念此能不悲舊

歲及舊人去去長若辭歲去還復來人老終就衰

歲宴方羣蟄吾道如龍蛇天運有節宣存神以自遮但

可勤飲酒苦志將如何空堂久蕭瑟今夕同笑譁巾車

既投轄櫪馬且置搗生涯須爛醉暮景亦太斜座中汪

舍人少年未蹉跎豈惟爭一歲一日猶可誇

蛟門長予一歲

蛟門見和復次前韻三首

邈矣燧人氏實始命四佐譬彼構廣厦程材市其貨匠
伯引繩墨杗桷中細大蕭蕭櫟社木輪囷空偃卧誰能
為犧尊青黃光照座同生天宇內如蟻共在磨來風一
披拂沃若青陽過請君聆此歌意卑非寡和

騏雁綰繳疾羅鷺鼓抵遲黃鵠遊萬里一舉何能追井
蠅笑東海鰭鰕安津涯長蛟在泥滓雲雨貴及時丈夫
自齟齬奚能事甘肥一嚮食海鳥顧視增憂悲眈洋見
渚崖澈澈將焉辭願為逍遙遊無使翎羽衰

駟不及吾舌遂為添足蛇茹之則逆已吐之誰可遮不
知汪夫子背面謂我何六街漸鐙火兒鼓已競譁且為
犀首飲不學漁陽搥君看如眉月清影又復斜良辰難
合并一笑無蹉跎吟詩自喁噏軒輊謝衆誇

人日雪宿左掖用坡公聚星堂韻

春氣涉七莫弄葉魯陽戈迴六瓣雪花神作意爭日時
青帝行空渺愁絕掖梧弱枝不勝寒苑松老幹渾欲折
斷續銅龍漏有無離披鵲鵲光明滅細草應知兔跡深

錦鞬乍見鷹翎掣坐憶屏牕隔翠微生憐綾被消紅纈
已堪羈夢溼如雲賴有清言霏似屑閉簾覓睡何陰森
呼童試問還飄瞥千秋出守香流風十韻強哦供笑說
雖無玉月梨李梅用意宜如金點鐵

夕垣與南溟容齋

夕垣鳥啁啾棲樹求朋行而我悵交友相逢如面墻曹
署豁野性二妙同疎狂名理按險語幽賞娛中腸東除
簾戶閉曉暮接一牀自吟各有以妍媚非時妝刻燭驚

童奴不知老鬢蒼蛾眉弄新影所惜在景光

同南溟湘北春宿左掖聞貽上將至用坡公喜劉

景文至韻迎之

李生晝眠驚相呼謂言數子不滿隅歷下髯王久不見
只今如髯天下無俄而起舞忽離立問言不答歌夫夫
故知斯人有真賞何論醉倒蛾眉扶同時聚集者三子
張公九尺美鬢鬚為人風義好文藻亦云此理良非迂
蒼龍奮蟄烟景媚萬象品物皆昭蘇星光下燭耀衆采

誰能謠詠驚彼姝我顧二子發長歎碧山差樂寧負吾
髯兮與爾俱白首扁舟可載終江湖

放歌再用坡公韻

明月在牕誰與呼數枝風竹鳴牆隅先生宴坐百不思
更鼓未起人聲無三旬九食天所病霍然中夜歌可夫
絲竹不解作陶寫藥餌頗賴相撐扶銅鏡顚顚已上面
更堪揀摘霜髭鬚敝屋青山何太晚殘經白首正坐迂
得句淺澹取押韻哦詩漫浪非和蘇朝餐暮卧聊爾耳

雖百年活豈復殊先王道在古聖遠茫茫天壤乃有吾
明月與汝生為徒隨風一棹遊江湖

雙鐙檠

雙檠便且光雖雙同一足量之尺不盈夜夜棲雙燭雙
燭照殘書開卷愁已續指摩老眼困一字屢詰曲念昔
年少時六籍高閣束時文侮聖言謬語中流毒背人探
古冊未齷若嗜慾羣童守師說每見遭誚辱及今半面
識炎冷豈同俗閒退轉益親雙檠對相勗單檠不努力

坐待華顏促寄語少俊生繁燭寸如玉無為墻角棄此
義韓公告

書于章雲所藏惲慶仿王摩詰晴川覽勝圖

丹青亦小藝粉墨留終古華纓走黃埃過眼誰復數藍
田老畫師生綃在何許歷歷晴川花翳翳淨初吐正恐
隨春風飄零作紅雨

祀夜壇門呈張南溟侍郎

凍髭呵復解滴衣如溼雨殘夜月逾明天寒翳更吐風

枝鳴幽禽藉草命徒侶是夜冬節長坐久數更鼓引氣
溫丹田聊以救疲苦老面新多紋熨冷手數舉我本田
家夫日出事畝故嘗把鉏犁所願畢雞黍請看兩鬢
絲量力守環堵

虎坊南別墅健菴招同西溟竹垞燕集

掩關過春風吟謳害寢食朋遊豈不佳舊故頗遁匿類
別微尚殊嬾性况偏側夫君磊落人二子不雕飾折簡
呼相從高樓展顏色檻牖俛遠林尋尺納衆域野桃斂

纈紅壇樹積鐵黑杳窅初來徑欲記自閔默廊迴惜行
深石危訝步仄羣巒像輦密交檐解倚踣飲酣屏惆悵
語謹露挺特外俗誓早捐幽清幸兩得懲忿除咿嚟為
樂爭晷刻虛亭改斜影昏鳥接歸翼夜魄棲空牕醉歌
寫胃臆

同健菴竹垞登黑窰廠高處讌集

吾曹文字飲同遊無擇行虎坊南尋春龍潭北探勝北
臺風搖搖所貴豁野興空濶不礙目四天垂欲覓峰堆

衆嵐昏水漾一波淨日下松壇陰深碧鬱交暎俛仰乃
自適飛躍各相命夫君獨棲棲曷不師尼聖刪述志千
秋反魯樂則正吾歌或可夫安能獨無悞亦有木強韓
窄韻長詩稱嗚乎敢望公窘曲押競病

豐臺看芍藥

東方射牕一寸白殘夢猶為看花惜玉街清酒隔夜沽
提壺喚起驚僮客曲臺花盡芍藥新狂香浩態愁殺人
黃金買醉不快意與君空負頭上巾

次韻宋穉恭兼寄孫止瀾

磊落同歲生吾愛孫射州聖道雖浩邈志士耽丘朝
寄詎不任避榮追前修五年三請急歸必與予謀斯文
在草澤才俊勤羅搜宋生清門子偉盼俯匹儔矯矯有
父風弓箕傳吳歐高情慕篠簜塵鞅辭由求洪河方奔
決誰輓滔滔流結駟誠漫浪枕石亦繆悠時潛或樂行
試上金閨遊問知射州信神往不得休皇天老眼明日
月雙瞳眸胡不照幽清痼疾紛相繆牀第因此人恐為

衆士羞取友必豪賢可與學孔周宋生父子間逸氣橫
霜秋淮水出桐柏近為禾稻憂忍飢誦古書吐氣卻輒
柔芒刃終不頓日久無全牛生觀上國光我欲棲汀洲
逝將遠悔吝寧獨嫌偃僂閒為秧馬歌或與漁者謳因
風寄故人此意誰為優故人昔喜酒為我傾一甌回頭
謝世上不知蘭與蕕

送穉恭兼寄尊甫射陵先生

鳳鳥千仞翔遺音渺八極麟角世亦稀見之渾未識宋

生名父子清流展物色淮水行舒舒乃出桐柏側金莖
露高潔朱絲絃正直壯筆戲海鴻野鷺豈茲得欲作綵
衣歸不願龍巾拭先生山嶽姿亦復弄毫墨寄我空中
書千秋石不泐臨風景豪賢絮語不能默

送張南溟侍郎還京口

離堂起蕭瑟絲管淒微風夫子秉遐尚高揖辭羣公結
歡二十載往往連孤踪餞酒不能飲淥波盈樽中揮手
且勿道會合安所窮潞河雲水清倒影秋花重殘月挂

海樹芳蘭靡汀叢江樓繫烟艇晴日天冲融隴岡盤龍
目作鎮金焦雄采秀玉蕊亭鐵瓮森芙蓉長笑青雲人
別久巖戶空他時或相訪騎鹿茅山東

送徐健菴尚書歸吳門

青春帝座傍紫垣明一宿尚書森寒芒璇衡相左右公
真天人姿神寄邈巖岫

九重念別深三接動連晝造膝語不聞宮壺每添漏寶
牀扶龍鱗華茵暎鳳唼

賜書墨猶溼鑪烟裊歸袖南牕驚儕輩東華問門候
聖朝禮賢臣歷古不一覲公其愛玉體名在金甌覆

聞道

晚歲得聞道懶不復吟詩今茲理藥餌因病多閒時
呻吟秋蟬聲斷續春繭絲知希則我貴綺麗安足為古昔
賢達士陶白良可師以我觀二子猶未掀藩籬不免文
字習恐為聖者嗤今之雕蟲人聞此必反訾而我欲無
言溟濛順希夷

新年

新年塵事靜歌笑亦已闌
嗒嗒午雞聲空簾風寒翻人
生渺滄海一波幻影間得此
且為樂不慕天上仙海波
本無意隨彼春風還仙者多
畏忌竦息蓬萊班花開青
綺牕酒半生朱顏看花酌美
酒與子娛新年

新年送別

曉駕午在門離堂語難久
君歸愴朱顏我留傷白首微
霰欲成花輕煙未着柳長恨
送別心不在春風後

燈夕醉歌示廖樊兩生

東風作寒波泛酒出遊不如杯在手六街塵土吾所憐
萬事沉冥輸笑口眼前物態輕鴻毛閉門明月春天高
燈火如山坐如塊醉歌亦復尋二豪西樓烟牕寂如此
有酒盈樽呼不起玉京仙人騎鶴還午朝碧落暮三山
謂言汝曹酒謫仙即今不飲空百年

行廬贈張上舍琇瞻敦復尚書猶子也

行廬周微垣索鈴連禁篽張公江海姿魚帶必雙文綰匿

牀非浩然伴直得小阮森如玉樹質會是竹林選釣車
吾方營刑柄詎當攬謁謝上東門經過華陽館瞥然見
公子耳目頓清遠野花紅始然園果綠何纂山鳥嚶其
鳴林風泠逾善欲別上馬遲垂鞭不覺緩

醉眠對月放歌

落日已遠烟雲殘三兩星宿森芒寒頃之月出庭南端
醉卧短檐天地寬咫尺不疑星漢遠放眼那覺闕山難
玉京金闕隔何許狂吟驚絕難攀緣黃帝乘龍所躡路

微茫陡絕一髮懸葛許之徒可詫異白晝直上攜飛仙
沈想此事心如顛使我竟夕不得終歡顏洗醖更酌酒
蕩滌萬古愁寂寞莫此形骸昔人無良謀堯舜之名如浮
漚秋風蔓草繁荒丘歌終渺渺增繁憂

錢宮聲松屋圖歌

春風射策明光殿玉勒蹋花共遊宴風塵瀕洞歲序移
十年不見錢郎面江路漫漫江水深攜畫遠涉時悲吟
東華輭紅沒鞍馬秋城寒山勞寸心歸來細視松十尋

長風諤諤吹衣巾蒼濤飛翻白日出窈窕為我開深林
青山空濛落瀑布石痕杈枒水洄洑流入萬里之長江
游龍行天挾煙霧錢郎錢郎何為鬱鬱久居此舊隱如
斯不歸去君不見昨日東園花夭桃穠李空霜露天寒
歲暮百卉凋惟有青松尚如故古來材大非偶然坎壈
豈受時人憐

京東贈張玉田兼寄張廣寧

京東至陪京郡縣連亭障文武吏士中所見或冗長千

里得二張每念不能忘
玉田楚才士風操鬱清壯
夕陽城西亭接語領微尚
使署開早花
牕月暎帷帳客路役
夢魂憶子頗神王
晨別燕山側黃雲迷背向
回颺遵塞垣驚濤鳴瓮盎
行行灤江濱秀色稍奔放
十日見大海長城亦殊狀
關門野鷄鳴方軌狹而妨
豁達忽無際天開眇空曠
相顧徒侶單邊心增惻愴
竄墟想人民戰壘恥將相
軍壕委白骨蔓草甘所葬
經過狐兔蹤豺虎步蹇亢
半月抵醫閭縣令非漫浪
廣寧昔重地亂後色凋

喪祀事亦孔明經營到纖繡萋萋木葉山陵土豈無恙
並馬行東路鴨江引春望窮塞得鄉彥精意矧神諒平
生足跡窄茲遊已云暢寤言懷二子浩歌襍忻悵

角山贈程淄川

昔我出關東登望關門樓羣山連波濤騰涌天龍遊長
城為鱗鬣角山為舌喉尾蟠荒陬外首注大海頭高亭
冠山巔步櫚俯滄洲程生傑雄人翱翔夫舊邱蓬萊與
方丈眼底自拍浮縹緲三神山脫躡萬戶侯奚為客京

輦遊戲驅羸駒闕樓留我詩君歸試一謳

喜雨

久旱氣始潤五月生新涼霧宿林景碧雨過斜照黃未
知黍豆色已覺花藥香京城百萬家糧艘仰四方小人
習獄市

朝宁憂農桑昨者下

詔書切責在官常委職操文墨忼慨中徬徨高雲閉赤
日太白晝遽藏今當見開霽青空絕纖芒理數相感召

天心為低昂乃知

帝好生此身逢時康

晚眺贈吳玉隨編修時移居東鄰

橫絕城頭山放眼不到地蒼然百萬峰杳杳落檐際雲
樹無兩色天嶺但一氣連緜亘明霞崑谷積空翠城中
端居人戶牖分遠勢荒庭稀遊從長夏寡人事山色時
時來短牆得羅致喜我素心友巷南新移至雖未晨夕
俱客情覺中遂焉知君看山非我看山意

即事憶山園

陰雲滿中閨曉露泣金井種花三徑荒落葉萬山靜玉
樹流淒響錦禽弄孤影歸來早閉闌水樹歡朝景

聞雁懷張公孚

陽景翳飄風孤雁行且吟不見過庭影空聞天外音之
子渺江渚悠悠春水深新裁一書札遠寄南飛禽

月下懷樊葦村

門掩春院月無人與我共娟娟照庭樹花落影遙送迴

飈懸砌陰含煙嵌牕縫清冷閒七絲思君聊一弄

午亭文編卷四

欽定四庫全書

午亭文編卷五

大學士陳廷敬撰

古體詩

立夏氣始至贈湯潛菴司空

立夏氣始至晝日昏昏然歲月真白駒悔吝成華顛歎
恨晚學道欲老今衰顏先生玉潤姿眸子瞭且妍修辭
寡則要妙理無支繁物我通冥悟冲和相盤旋對之心

融釋追往徒險艱景光不肯留此日足可憐別後三數
晨示我以文篇浩浩河江流漭漭星宿源聖路久充塞
百家翻狂瀾誰能芟淫詖默識天無言遊心墳索外斂
精義皇前誓將奮遲暮矯厲思孤騫

瀛臺進講贈孫圮瞻學士

歷歷河上柳宛宛城邊路夜短雞始號月出天已曙驅
馬瀛臺門

神居渺烟霧玉繩低繚垣金波耿迴渡屢修獨對辭一邀

重瞳顧湖州真人秀眉心膽露上闌義軒文下晰王
霸務

至尊時霽顏鄙儒謬學步荷風翻縹緗鑪香裊章句終
恐徒冰兢感激愧

恩遇忽復秋風涼疎雨滴瑤樹

破屋行贈葉子吉侍講

破屋不任葺四壁空嵯峨夜半風雨至屋漏成洪河漂
搖增繁憂夏秋連滂沱崩騰奪視聽耳目被傾邪詎惟

錯昏晝實恐陰陽譌重茅卷驚湍餘花委迴波空梁燕
雀飛蝙蝠伺其窠禽鳥飢為身所見理則那黃鵠翅翎
溼亦如嬰虞羅悲鳴欲有訴翻懼彈射加偏側南巷士
移居近西家書籍正捆載瓶罍亦紛拏君如遷喬鶯我
如槃室蝸破屋雨不止壓覆將如何感君有同患寫意
於詩歌

御府藏翰歌

時上御乾清宮名臣賜觀
名賢法書越日臣為詩以獻

聖皇稽古典制作覃敷文命流荒朔玉榻引近親儒臣

縹緗羅列探祕閣書法無過王右軍淋漓寶墨今尚存
龍跳虎卧在眼底置身鳳闕當天門草聖昔時誰獨步
漢有張芝唐懷素長沙自言得三昧快筆風颭與神遇
平原大節何嶙峋端人正士儼垂紳世人學書工側媚
塗飾形貌無其真五代以來推趙宋眉山作勢看飛動
大海紫瀾波濤雄瓊玕碧樹枝柯重米家書畫滿載船
字跡逸宕尤爭妍近來董王皆自出翰墨風流天下傳
考亭樂道亦游藝縱橫妙得蒼史意頓挫盤蹙勢最奇

行空天馬羣鴻戲其餘書者紛紛多承旨秀出誰能過
東晉遺法宛猶在戈鋌波磔含冲和數卷蛟螭盤玉軸
名家豪素藏天祿寶篋開封近

御頻光華偏入

重瞳目丹青綈几鑪烟浮

宸章五色兼銀鈎神姿結構世無比落筆萬象風雲收
至尊宵衣偶揮灑賈絕天巧非人謀允惟

睿聖超百辟生知好古而敏求

中秋祀瞻送酒

去年登樓風雨夜肺病不飲杯空把今年明月夜登樓
有酒無病心何憂湖州學士猶記某遺以香醪可一斗
開瓶傾寫清光來醉舞狂歌迴白首卻憶西清風露涼
殿門帷幄靜高張影娥池畔金波月曾照攜書近

御牀

夜行

遠樹啼荒雞秋城滴疎漏起坐夜方宴獨行念如舊寒

沙草色微殘月人影瘦韶華去已遠朱顏不可又千載
笑子雲投閣寧自救

夜直懷杞瞻

窈窕洞門夕持被入屏營周廬爛官燭列宿搖空明民
畧近崇高夜久宮漏清皎皎階月淨漠漠池水平羣居
寡所諧獨處懷友生晨朝陪經席鬢髮添霜莖

韋蘇州詩書後

我觀韋公詩澹然生道心鮮食冰玉潔浩歌流清音疏

絃下衆響繁手聲方淫誰能追大雅辭多吾所歲

昔遊贈衛慎之明府

昔遊灤江上落日弭輕榜浪花暎園蘚魚泳出浮響薄
雲邀旅宿孤霞駐清賞沙邊桃花邨野徑散遙想君今
鳴琴暇遺蹤一相訪

秋夜

凜凜天氣變冉冉時節違明星帶檐樹淒風吹荆扉秋
夜何漫漫塞幃伺晨晞黃葉旦夕賁鴻雁東南飛萬景

思本根吾生亦何依
運遷感物理時往悟世機
空軒獨寤言積然如委衣

歲暮

崢嶸歲華臨欲滿
一如寸寸彎強弓
十年往迹宛在眼
艱難默數風中蓬
流光袞袞奔輪裏
暮景飛騰已如此
有酒且飲酣且歌
萬事無憂亦無喜
天晴斜陽牕雪明
紅梅薦繇蕊半委
何處紫芝與石髓
濁醪此中有妙理
世上紛紛焉足齒

廳前水石

怪石誰所作開池俛前牕其上想丘壑其下觀湖江輕
風澹微波藻魚自擊撞颯然風雨至流聲亦淙淙念此
一曲水不殊萬里瀧時節逼炎燠即物心屢降

移居別庭前山石

東書遊京國并載無一椽僦居胭脂巷怪石羅堂前僻
性寡朋侶對此情孤騫落月偏曉勢斜日迴遠烟花
不岑寂秋樹相連娟閉門長兀傲隱几舒沉緜有時因

塵鞅芒角遭磨鑄茲石不改色專靜無尤行蕭條別汝
去况復當殘年回首風雪夜幽夢遥相憐

流求刀歌為汪舟次作

丈夫得志為雲龍搏服蛟兕羞雕蟲歸來畫笏奏天子
寶刀拜獻明光宮餘者虎氣亦騰躍拔鞘漠漠生涼風
滄波險絕窮髮東乘槎使者浮空濛圖書裝輕不滿篋
碧花鐫錯青芙蓉含霞飲景霜鏐動方口斫地如渴虹
麟角鸞趾詎所觸刺割暴猛蠲妖凶古強入山豺虎逸

方平獨卧鬼物空豈似此刀光熊熊大食日本皆提封
三金合冶紫烟重海日鼓橐波雲紅洮鴨綠石不受礪
雪刃凌亂神鼇峰東方侏儒飽斗粟昔者賜出驚鳴鴻
君方入侍禮遇崇身夾日月乘天風遠人脫贈意有以
斷金切玉理則同沙場此物久不試來庭文齒兼穴胃
禁中頗牧挾翰藻搖筆辟易千夫雄清書造膝三數公
英盼往往迴

重瞳男兒致身有如此况值威德兼黃農試看渭叟鼓

刀者干戈載戰橐強弓

夏夜

朱曦晝晷長入夜絕衆緣撫枕獨不寐危坐臨前軒自
非蚤聞道奈此百感纏風埃苟不興水鏡良復然朗月
生奇懷皎皎光輝妍易簡澹自足何為紛險艱以茲頗
念世人誰金石堅

問蝗行

六月八日蝗暮飛紛如接翅昏鴉歸忽欺斜日夕影亂

漸掩列宿寒芒稀汝曹瓌瓌行醜惡能令天宇沈晶輝
昨者

朝宁下明詔憂旱問蝗何因依公卿不語面平視或舉
五事及細微某也昂首矯奮臆上言

主聖臣職違下言小民吾根本三時勤苦終歲饑長官
鞭笞吏卒怒但向公府供輕肥夏秋稅糧分應爾緩之
數月穀庶幾自知無有大裨補傳聞此語是耶非天心
至仁諒無他涼雲吹雨蠲煩苛傾注四野蘇黍禾蝗欲

下來愁奈何吾言不中理則那

題禹尚基自寫真

禹生靜者懷孤騫
搖筆風雨落屋椽
雨收風止萬象寂
海霞島日相澄鮮
丹青好手衆所憐
幽樹卷石皆娟娟
水邨之圖世最傳
禁廬一見心悠然
集賢學士共嗟賞
瑣牕晴畫生雲烟
生也此圖擬水邨
神妙意若無王孫
更自寫真著蓑笠
便欲漁釣歸柴門
王孫遭時昔多故
齒豁頭童不歸去
丹青猶有身後名
富貴真如草頭露

生方年少豈長貧奮飛一舉陵高旻

錄別二首

皎皎明月光照我清夜牀欲寢不能寐攬衣起徬徨羈
人思萬里各在天一方雙雙兩黃鵠中道陵寒霜羽翼
一以乖河漢遙相望

北風吹河梁明星隱歷歷悠悠征馬嘶驅車將安適白
日照東隅黃沙揜行跡念我同袍人高舉奮羽翮離顏
如卉草霜露忽復易時節已晚暮窮賤竟何益

出門

十日嬾出門萬事何叢殘事如風中花心如古井瀾飛
花投墮水井瀾寂不起此語解書紳時行而時止

浮山和敦復時在直廬

我聞浮渡山欲往情蕭騷瑣牕閉晴晝寫興於詩謠品
崿忽在眼飛薄如奔濤石罅梁可數一一穿青霄空靈
駭瀕洞倒側疑簸搖粼粼長風聲萬竅皆怒號中有千
載雲出岫不可招蒸嵐自通透濺瀑巧適遭真宰工刻

鏤無乃用意勞卓犖龍眠公嘯詠冠偶曹鳳鸞在巖廊
猿鶴空林臯斐然繼有作聊足以自豪

夏日遣興四首

幽居卧青林白日不得晚語默失端倪情欲爭舒卷不
如捨之遊寓目成登覽昔者古幽州平沙曠浩衍飛甍
何參差引流亦宛澶此中英雄人朽骨疇可辨茫茫六
合間人命何能逭誓從今日後悠哉謀獨善

西日既隱山餘光樹顛明赤雲帶連岡綺霞散層城虛

檐交微風當牕落青冥林景稍一動脩然烟磬聲寡欲
性有託息慮身無營大雅久寂寞苦吟誰見榮勲名苟
不立章句老此生

依依見新月下照古時城古人對新月應如今人情列
星初爛漫滅燭何杳冥河霧宿近樹竹烟羅前楹風鳴
弦素響夜靜吹玉笙閱世樂幽獨外物身崢嶸有酒起
自酌誰能關浮名

我本蓬室士田牧東山椒山家閒歲月即事以自勞水

碧日照色麥黃風翻濤西莊邀社酒東鄰饗魚羔端歸
方三載行遊違林臯中情異絕裾吾生希挂瓢解愛五
千言日玩乾初爻志士陵鴻鵠小人爭牛毛遯世以無
悶託興長消搖

洞陽山

我家太行盡處邨蛟龍欲落留爪痕蜿蜒腹背故隆起
振鱗掉尾如雷奔波濤隱見吞萬壑似覽衆水窮河源
古稱上黨天下脊茲山拔地尤騰騫俯視砥柱一卷石

析城王屋雙杯樽頗訝大禹所經畫足跡未到回南轅
徑下河濟急疏瀹北顧參井高莫捫乃知龍性躍天漢
肯同蠓蟻尺水渾太行以南多峻山地勢愈下難並論
茲山何不列嶽鎮使我歎息增煩冤何為歎息增煩冤
萬古無害茲山尊

開元鐘

後唐李嗣昭守上黨勝梁範銅
為鐘在開元寺後置元妙觀

蒼茫陵谷開元寺古鐘猶帶開元字尋向桃花觀裏來
鐘聲依舊浮空翠此鐘流傳自後唐誰與作者李昭義

黃塵清水變須臾，鬪雞小兒聊角戲。昭義此時亦人傑，
屹立孤城下無地。夾寨重雲鳥不飛，余吾殘營白晝閉。
流矢拔足客不知，血暗淋漓臂龍驤。神捷等沙蟲，
銘以蒲牢毋失墜。生子當如李亞子，進通忠孝先王識。
我怪歐陽傳五代，嗣昭特書多可紀。當時亦有劉義叟，
飄零頗恨文章躋。今我來觀開元鐘，與客談詠梁唐事。
更數百年歌者誰，鐘聲未歇聞歎喟。

冬日雜詩四首

雪後落照紅陰風黯中夕蕭條關塞情杳然生咫尺念
我故鄉人同作他鄉客冰堅蛟龍深山長鳥獸寂戚戚
傷精魂悠悠阻筋力寒鐙閉門時明月照促膝

流風舞迴雪飄飄盈客衣連雁去安極路遠何時歸含
情掩房閨憂來不可揮觸物悔吝集觀身色相違達人
慎其端託想謝危機擁衾抱霜月四壁生清暉

仙人王子晉霞舉陵太清緬想鍊金液呼吸獵至精所
以緱氏嶺時聞吹玉笙逸響久歇絕誰聆空外聲徒令

千載下寂寞傳其名

少負英邁氣索居逃人羣偶然事詩書遣情遊天雲一
自落世網昏宦相糾紛起舞擊短劍忼慨難鳴晨流浪
時忽徂三十無令聞空名竟何益心懷難重陳

東岡獨遊

亭午風日佳陟高循前澗石古徑杳冥溪長水清淺巖
中熏疏蘭汀曲蔭蒼蘚臺行既脩迴樹坐乃幽緬挂蘿
弱可捫落花多愁踐懷古事豈殊人往跡空顯依依楊

柳華萋萋葛葉展時序催物情悠哉誰與遣

東岡同子弟及張王二客

樊川美風日羣遊陟東岡少長各異趣曹偶森成行張
卿頗解事王郎興亦長子姓復朗拔矯矯凌雲翔伊余
少欣悅頗怪鬢髮蒼叢祠晚雲薄哀歌何激昂遲暮賴
陶寫此意成悲涼登高望古城墟里烟微茫俛仰已今
昔塵世鬱中腸寄言少俊人及時為樂方

空山

空山悽心魂中夜四五起
惻惻天蚤寒悲風鳴不已
六
月草閣涼况乃秋節
逼牕月炯殘明壁燈凝
暮紫稚兒
睡爛漫倦僕坐觸抵人
生雖殊塗勞逸本一理
念我徒
自傷多憂應爾耳呼僮
使之卧抱膝當隱几

石閭晚眺

山高墟落出社鼓晚欲歇
林陰暝色來邛燈見復沒
獨
立聞虎風小步躡松月羣
動又已息幽尋愧倉卒農
人
夜早眠鼾睡侵卧榻更
多秋蟲聲仰枕兩耳聒誰
與寫

愁憂野宿寄傲兀

返舍留三日復往石間

秋風前日來我亦薄言歸雞鳴發山館日高到柴扉寄
跡如飛鴻爪雪相因依一墮泥塗中膠擾森重圍算口
計米鹽將老生事微兀兀困細瑣愁卧至夕暉開我所
居室凝塵蔽敗幃拂拭愴孤懷坐念百事違明鎗飢鼠
竄昏院蝙蝠飛妻子可脫屣身世真韞韞吹笙憶子喬
化鶴思令威感此捨之去聊用息吾機

秋日往石閭

捨策涉險艱窈窕窮清秋溪流沙徑細草長荒陂幽日
高臨往路亭午陟遠丘舊居渺叢爾中有萬古憂返躬
集悔吝閱世紛愆尤遯跡心逾危憫俗行且休遊戲采
芝藥芳序忽已邁羨門不可即徐生入海求仙者良冥
漠塵埃難久留何得奮翎翅遐舉凌滄洲

思母菴夜雨

空山夜雨秋浪浪危樓夢迴衾簟涼我今獨來神黯傷

千憂萬恨堆心腸，雞鳴牕白雨不細。睡鄉避人亦避世，
長松裊雲烟漲谿。杳杳人蹤，門晝閉，陰黑睡起疑日中。
山前山後雨濛濛，去家十里信不通。山澗水滿岸路窮，
前日我來秋風淒，今日欲歸秋雨迷。人生聚散隔風雨，
塞驢卧鳴僕，諄語前日日晴不肯歸。薪芻雨阻人驢饑，

樊川東岡寫懷二首

伊昔少賤時，志在泉石間。高步謝時輩，遊射窮谿山。隱
遯事不集，挾冊謁

帝關睨眴公卿側跌宕文史班歸來忽華髮壯日不可
攀陟丘感舊跡照水羞故顏南山獨尚爾蒼翠橫烟鬟
安得遂雲卧仙侶與往還

謝客慕張邴乞身不待年稊生愧嚴鄭樂道欲自全我
無安石量而乏絲竹歡亦有東山遊彷彿臨斜川展步
涉林澗忘疲恣躋攀且無念百歲聊開一日顏淒風生
巖壑暝色紛烟巒端居集遙慨息慮終閉關

高齋二首

高齋日已暝，慄慄霜氣寒。
倚闌望遠道，露下衣裳單。
入門復出門，躊躇心未安。
委委池中荷，萋萋牕下蘭。
及時媚榮景，惜哉芳歲闌。

北風日淒淒，中堂明燈低。
北風不入戶，所居各東西。
隔河有言辭，阻風莫致之。
雖不聞好音，清芳夾路垂。

南樓夜歌

日落闌干霜氣幽，燈昏鐘鳴山寺樓。
書帷牕幔下已久，天風新寒增暮愁。
鴻雁嗷嗷集中洲，沙明月高繁露流。

思君不見城南夜黃草白雲天盡頭

東山亭子放歌

東山望南山百里墮我前山亭橫絕浮空翠闌干縹緲
臨無地我來氣與霜天高風塵歸後寒蕭騷拂衣枕石
每獨往埳塍羣笑滄溟鼇百事回頭如舊否一片青山
落吾手倦客重尋岡上廬童時舊種門前柳盡埽西風
萬古愁且傾落日三杯酒君不見謝公高卧東山時起
為蒼生已白首昔時絲竹轉淒涼美人黃土今安有百

年我亦一東山日夕樵歌動林藪

譜牒後書

側聞長老訓諸祖稱豪賢披籍閱往代歎息良復然誠
詞炳星日志氣薄雲天處士及吏隱一一皆可傳淳休
被邑里聲華如蟬聯緬維卜東莊始自宣德年耕稼三
百載風義桑梓前小子恥甘肥食利忘所先惕然從中
懼勗哉以無愆

南樓見砥柱

午壁亭西南有山亦名砥柱

樓外砥柱山几席浮青空神禹所表置高標天闕通王
屋連析城秀色摩蒼穹登樓遙見之懷古心憂忡二嶠
秦壘滅三川晉國雄蠻觸紛鬪爭役役會有窮渺然想
開闢元化觀無終

題東坡先生集

星宿渺一泉潏沆歸滄池黃河天上來彷彿青蓮詞杜
韓鬱崩騰迴風激瀧湄香山放乎海澹澹天無涯餘子
導其流遙遙分纖支蘇公天上人萬丈銀河垂舉手捫

星辰足躡龍與螭旋幹周四運浩氣森林漓感心生直
亮體道忘艱危聖刪三千篇却火燒其遺真宰固有意
風雅將在茲斯文配天命大化需人為何不陟輔相致
民如堯時一聞韶濩音李葉還春熙

道上逢張參首丈

驅車越郊邑落日下馮軾豈不急歸思惜此輿臺力既
夕煙霧生星月互相匿遲回大道傍感舊勞胸臆睠言
更歲華霜雪暗顏色對面始若疑聞聲乃歎息心懸秋

浦西目斷黃雲北相逢逆旅間離別情何極

九女臺北黑龍潭

維南有金焦江間屹不動詎知砥柱東山起挾河縫河
流兩汙汙北山磬而控其北皆連峰排拶故縱送陡崖
臨數仞潭水鬱湏洞相傳是海眼仰口若大瓮鬼工施
鑿成人力匪所用俛視悖心魂危立仗僂從四山下驚
風崩墜影與共取道青石叢出險衆聲哄此中龍潛棲
禱雨屢則中古祠明月高秋軒發幽夢囊中五絃琴改

調一撫弄

送韓六一僉憲赴桂林

春明門外柳往往拂行裝疇昔攀柳時送人還故鄉故鄉今送人駕言適何方遥發天北隅軒車指南疆居人戀落日客子懷路長矯矯雙黃鵠陵風各分翔良無萬里翮何因附頡頏

贈李翰之

吾州隱君嘗樂饑一生高視世不羈西崖古屋蓬蒿衰

小亭晝閉春陰移我時徒步往見之顏色渥丹霜鬢滋
年近九十心膽竒大書灑墨光淋漓短札細字如毫絲
方瞳炯如巖電垂僊者縹緲高莫追浮丘洪崖世難知
吾徒縮手歸來時赤松黃石今可師

偶觸懷故山

道攬輿地圖適見岳神字悲惻從中來潛然落寒淚此
山天馬形浮空勢東至其陽宛迴龍母阡鬱蒼翠兩載
閱晨昏新松常守視悄悄巖谷間曾有萬端思歲月何

逾邁真如過隙駛臨別屢回頭欲去每停轡晝思勞遠
魂夜念驚寢時忖所歷山或與此山類忽然覩名稱
感觸心中事朔風含酸辛落日助怛悵恨不如飛鳥疾
往有翎翅掩冊神太傷孤征渺行騎

登屯留城至龍潭

登城秋氣變淒風屢增愁路遠一望鄉但見漳水流漳
水南自去客行北未休寒雁相背發眇眇高雲浮城荒
悵籬落樹古驚潭湫小邑窮歷覽見孤征獨夷猶立馬更

延佇應知道阻脩

宿沁州懷吳銅川通政

凌晨涉野流岵岵入澗口林深長木魑堠古立土偶霜
葉得紅梨風條惜黃柳歲物森愴懷關山鬱回首地聞
叔向賢邨云徐勣後舊蹟渺猶存遺風嗇而厚懸崖人
散居營窟老相守華櫬及鼎肉蕭然此安有仁里銅川
子潔清吾所友夙歡結同心離居念分手重為京雒遊
然諾應無負獨覺感異方鄉心亂已久

六賢堂

下馬平潭驛訪古六賢堂
淦陽政寬簡湧雲思煒煌

趙尚

書東文堂即湧雲樓舊基趙有記

文獻總文柄楊趙齊輩行

楊文獻雲翼

左

司富才藻晚節猶芬芳

元左司好問

樂城老封龍鑑湖映末

光

李文正治

四賢既卓犖堪此一瓣香
後益以王呂名蹟能

禁當

王司業構呂忠肅思誠

山川景英哲祠宇成蒼涼
士節古所

重此道令凋傷荒城鬱茂草
倚徙悲殘陽

梅花用坡公次李公擇韻

寒夜凜客心雞鳴車轂動節往如逝湍光景一玩弄稍
惜幽牕梅著花破嚴凍天公憐寂寞物態競喧闐飛霜
點衣裘風埃暗騶從我生無町畦昔者每自縱山澤延
四友竹徑從二仲息景棲東岡水石獲清貢冷梅坼冰
雪析析柯屢重卧厭短檐日疎影雜禽哢有時但孤吟
足供樵牧諷今是寧昔非當歡忍前痛光寵愧少俊鞍
馬事上雍未招羅浮魂但惹春明夢何當十年計遶屋
手既種春風吹白日羲馭不得輟別後綺牕前何人燈

火共挂枝愛桐花蹲池怪老鳳得如黃葉山灑埽青螺
洞待我花下歸白酒傾百瓮



午亭文編卷五